



наведи телефон

Луимә сәрипос

14.03.2024
№ 5 (1311)

www.khanty-yasang.ru

Основана 11 февраля 1989 года

E-mail: gazeta@khanty-yasang.ru



С. Ромбандеева вәрүм хури

Ты номерт ловиньтән:

Россия мәтэ тот суссылтаве

▶ 2

Мәнки рүпатав урыл потыртасүв

▶ 5

Үст сәлың мәхум кассыт

▶ 6-7

Ялпың-нәл-пәвылт өлнә мәнъщи эква

▶ 8

Тәрпит акван-атэгум

▶ 11

Такви пәслум хуриянэ суссылтасанэ

▶ 16

Ты хурит Сургутский район Русскинская пәвыл ханты нә Анастасия Анатольевна Комтина пәслым блы. Тав Ханты-Мансийск үст сәлың мәхум ёт касыс, нәт халт нәх-патыс. Сосса мәхум сәлыл хумус яласасыт, кассыт, ты урыл 6-7 ләпсыгт ловиньтән.



МЧС министр хум А. Куренков



Н. Комарова мир ёт пöслахтас



Л.А. Алясова Маша ёт

Россия мätэ тот суссылтаве

Мöлтэ тäl пäsныл пуңктотнэ үст Москват яныг суссылтап суссылтаве, руц лätңыл тох лäваве – Международная выставка-форум «Россия». Кäсың хöтал тот сäвсыр пүмыщ öлы.

Россия мä янытыл 89 регион-мä öлы, кäсыңе тот такви суссылтап вäрыс. Областит, республикат ос округыт урыл ВДНХ мät 75 колэт потыртаве. Тот мän öлнэ мäv öс янасыг суссылтаве. Тув кäсың хöтал мöt мöt мäхум округвныл ялантэгыт, матыр йильпи вärmаль суссылтэгыт.

Мир тот нас мирги, äлпыл лов щёсныл этипäлаг мус янге-мäne, шкoлат ханищтахтын няврамыт акваг тув та ювыт. Тäна-нылн округув урыл потыртаңкв эри. Мän тот тит хöтал рүпитасүв.

Рөтың юсвой этпос 20 хöталэ энергетик хöталыг лävвес. Та хöтал палыт мä-вöй мäныл нöх-винэ рүпата урыл ос

энергетика сäвсыр тэлат урыл потыртавес.

Ты кастыл округ күщай нэ Наталья Комарова тув ёхталас, тувыл Россия Правительство колт премьер-министрыг öлнэ хум Александр Новак öс тув ёхтыс, тэн акв щёстем потыртасбиг.

Мощёрт мän округувт мä-вöй 13 млрд тоннатэ мäныл нöх-виве. Тэн ты тэла уральтым öнщитэн. Элаль Александр Новак Ямал суссылтапн минас, тот ос Ямал мä күщайл Дмитрий Артюхов ёт потыртасбиг.

Мöтыт хöтал яныг ялпың хöтал öлыс – «Международный день родного языка». Мäньщи ос ханты лätңыг урыл потыртан мäгыс мän

редакциявныл тув ам ос Петр Молданов ялсумён, Петрханты газетат рүпиты.

Ййкванув суссылтан мäгыс Ханты-Мансийский район Шапша пäвылын Лидия Александровна Алясова тит äгииг ёт ялыс, яныгнув Аня öлыс, тав 17 тälэ төвлыс, мäнь äгирищкве – тав ййгрище Маша, няврамакве ат тälэ уц төвлыс.

Лов щёст рүпитаңкв та öвылтахтасүв. Мän пуссын мäнти маснута-нув массанүв. Лидия Александровна Маша ёт ханты ййквыт ййквсбиг, Аня сäңквылтас. Мäнь äгирищкве ханты лätың ат вäгтэ, ос ханты эргыт эргүңкве сака хäсы. Такви ат тälэ ос хүрмах эрыг ханищтам. Тав эргынэтэ ос ййквнэтэ порат мäхумн маттем та пöслувес.

Хöталыят порат щäнь лätңыт урыл потыртан мäгыс мän мöt колн минуңкве лävвёсум, ты кол лäваве – Сбер. Хусахтем хöтпа туп ёхтыс. Лävвесүв, пöслуңкв патавёв, ос ты тэла тäра ищхйпың мät суссылтаңкв патаве.

Мän ётув ат хöтпа потыртас:

– хакас **Руслан Ивакин**;
– эвенкийка нэ **Ксения Турчинина**, тав такви щäнь лätңөтыл эргыт эрги,

– ёрн нэ **Нечей Сэротэтто**, такви öлнэ мätэт сäвсыр рүпата вäри, общественный организацият рүпиты.

– «Хöтал» нампа округ театрувт режиссер хум **Виктор Евдокимов**;

– **Антонина Горбунова**, Мирхал ООН организация пäлыл рүпиты, тав мäнавн потыртас, хумос мöt хön мätт щäнь лätңыт ургалан мäгыс мäхум рүпитэгыт.

Кäсың хöтпа сака пүмыщ потыртас. Тән пуссын яныг рүпата вäрөгыт. Тäнти ййкваныл, эрганыл мöt мäхумн суссылтыяныл, мирн ань вäвет. Тән туп акв щёстем потыртасыт. Тувыл мäхум лäкквта та мингаласыт, мän ос ювле «Россия» нампа яныг суссылтап öлнэ колн минасүв.

Аквмат мäхум тыглетувле хäйтуңкв та патсыт. Насати, МЧС министр хум Александр Куренков «Югра» колнакн ёхтыс. Тав мän округувныл öлнэ мäхум мощ титыгласанэ, сака хоса ат потыртасыт. Тувыл министр хум хотталь элаль та минас.

Тох ты яныг суссылтап-капай кäсың хöтал рүпиты. Ос тот рүпитан хöтпатн сака тärвityң, кäсың хöтал сака сäv мир тув ёхталы.

Валентина ВАСИЛЬЕВА



Күщай нэ ляххал тотнэ махум ёт хонтхатыглас



Ишхйпын мәтвим хури

Н.В. Комарова

Округ күщай нэ Наталья Комарова рётың юсвой этпос оигпам элы-палт ляххал тотнэ махум ёт хонтхатыглас ос хурум арыгкем щёс тән ётаныл потыртас.

Яныг колтаглытн нётнэ урыл

2024 тәл Россият щёмья янытлан тәлыг ләввес. Мән округувт сәв нъяврамың колтаглыт хумус нётает, өвлэт та урыл тав китыглавес. Наталья Комарова ювле тох потыртас.

– Тыт өлнэ мир мән акваг нётянув. Тәрвitysщ өлнэ нэквет пўльницат акваг уральтавет. Ань тән «Буду мамой» нампа өлның нэпакыл ос самын патум нъяврамыт «Расту в Югре» мўйлупсал мивет.

Ань 74 сөтыра щёмьят тамле мўйлупса ыньщёгыт. «Югорский семейный капитал» оln-нётмилыл махум өс ойтает. Ты пора мус щёмьят хурмит манос нилыт нъявраманыл магыс олныл тәстувёсыт, ты тәлныл колтагыт самын патум китыт нъявраманыл магыс олн

миве. Ос ты олныт вәтихал нөх-нётает.

Юи-өвыл тәлыт мирув акваг сәвми, ань 1 млн 752 сөтыра 469 элумхөлас округувт өлы. Мөлтү тәлныл тыт 30 сөтыра сәвит элумхөлас сәвнувег ёмтыс.

«Самарово-Ханты-Мансийск» газетат рўпитан нэ Екатерина Антропова пўмщалахтас: «Тәл котиль этпос Россия Президент Владимир Путин Указ-нэпак хансыс, сәв нъяврамың щёмьят ёмашакв вос нётает. Мән өлнэ мәвт яныг колтагыт сәвсыр нётмилыл тыт мивет, ань мөт лильпи нётмилыл тах хансавет?»

Наталья Владимировна ювле тох потыртас:

– Щар сөль, нъяврамың щёмьят мән ёмашакв ыньщянув. Тән нәйпос, вит, рёг магыс ойтхатуңке нётает. Ойтум олнаныл 50% сәвит кәсың

этпос ювле тәставет. Ты тәл тәратым Указ-нэпакт хансым ылы, яныг колтагыт нәйпос, рёг магыс ойтхатнэ 30% сәвит олныл ювле вос мивет.

Мән ань номсахтэв, хумус пирмайтым сәкконанув мөт щирыл хансуңке ос махманув аква сәвит оln ювле вос выгыт. Яныг щёмьят өс аква нётянув, 2013 тәлт тыт 17 сөтыра сәв нъяврам өщнэ щёмья ылыс, ань округувт 43 сөтыра тамле колтагыл ылы.

Әс я ұлтта унсах вәрнэ урыл

«Ханты ясаң» газетат рўпитан нэ Людмила Гурьева китыглахтас, Әс я ұлтта унсах Андра пәвыл ляпат хунь вәраве. Ты унсах Октябрьский ос Белоярский районыгт өлнэ мирн сака эри.

Күщай тох потыртас:

– Та мәт Әс я ұлтта унсах 4 вёрыста палытаг тах вәраве. Ос та ляпат кит мән яг өвтэг, тот өс кит унсахыг вәруңке эри. Ты рўпата магыс 65 млрд солкөви тах эрмыгы. Ань эрнэ нэпакыт щёпитает ос 2029-2033 тәлытт сыс унсах вәраве ос лёңх тот пинаве. Ты лёңх хосыт Ямалт өлнэ мир яласаңке өс тах патэгыт. Мән ань тот рўпитан яныг күщайтн пўшмат хансэв, ты унсах ұнттуңке, лёңх тот вәруңке өс вос нётэгыт.

«Югория» нампа телекомпаният рўпитан хум Тимур Чешков китыглахтас: «Белоярский ос Хальүс районыг «Арктический зона» ләвнэ

мән ань хасвесыг. Тот өлнэ мир ёмаснувег ань өлмыгтэгыт?»

Округ күщай нэ ләвыс:

– Рётың юсвой этпос 17 хөталэт тот өлнэ махум ёт Хальүст хонтхатыгласум. Тән ты вәрмалил пуссын пўмщалахтасыт. Эрнэ нэпакыт хунь пирмайтавет, махум «льготный ипотека» ләвнэ оln виңке вёрмёгыт ос мощца процент-оln ювле ойтункв патэгыт. Тыил сәвнув та мән ёхтым организацият нётункв тах патает, сәвсыр льготат щирыл рўпитаңке тув вөвавет.

Сосса мирыт урыл

Сербия мөт хөн мәныл ёхталам хум Радован Ковач «Первое сербское телевидение» нампа колт рўпиты, сосса махум урыл кина пөслуңке тыг ёхтыс. Тав Сургутский район Коршунковыт ос Русскинт щёмьяг палт мўйлыс. Тыт өлнэ мәнщит, хантыт пёс йис вәрмаяныл хумус нөх-вөрмалтыяныл ос элаль тотыяныл, та урыл хум пўмщалахтас.

Округ күщай нэ ләвыс:

– Ты мирыт пёс йис тәгыл лүимәт өлэгыт. Тәнки өлнэ мәнаныл сака ўргалыяныл. Тән сәв мўтра ыньщёгыт, ты махумныл мәнавн ханищтахтуңке эри. Мощца хультум мирыт акваг нётянув, тәнки пёс йис вәрмаяныл, щән ләтңаныл ул вос ёрувляяныл.

Людмила ТЕТКИНА

Мәньщи хөтпанув округ миркол пәлыл янытлавесыт

Округувт кәсың порат хотты сәкконьт мөтнүв щирыл хаснә мәгсыл депутатыт сапрәнин атхатыгләгыт, халанылт потыртәгыт ос эрнә щирыл хаснәныл юи-пәлт, тәнаныл пирмайтәгыт.

Ань рәтың юсвой эт-пост олум сапрәниянылт вәт нупыл хұрум вәр-малит урыл потыртасыт. Тох акв постановление пирмайтасыт, та нәпак щирыл «Почётный гражданин ХМАО-Югры» намыл Еремей Айпин майвес, тав сәв тәл сыс соссa мир мәгсыл рүпиты.

Мөт тит депутатыг «За вклад в развитие законодательства» мәгылн тагaтан пөсыл майвесыг, ты Ринат Айсин ос Лариса Белоцерковцева.

Округ Дума Почётный грамотал мәньщи хөтпа-гув Максим Анямов ос Надежда Пузина янытла-весыг. Максим Андреевич Саранпавыл клуб-колт рүпиты, Надежда Савельевна Саранпәвылт «Оле-ненко» мәнь нйврамыт колт тәнүт пәйтым сәв тәл рүпиты. Тән соссa мир олупса элалы тотнә мәг-сыл янытлавесыг. Саран-пәвылт «Поиск» нампa колт кұщайг рүпитан хум Василий Рокин ос тамле нәпакыл майвес. Тав сәвсыр хөнтхатыгла-пыт вәрыглан мәгсыл янытлавес.

Ирина Каркочевич ос Михаил Еремеевский, округ Думат депутатыт рүпатат нәтнә хөтпаг, ос грамота-нәпакыл май-весыг. Ирина Валерье-вна сәв тәл Татьяна Гоголеван нәтым рүпиты ос Михаил Анатольевич Александр Новьюховн рүпататәт нәты. Тысәвит сәв соссa хөтпатос ханты,

мәньщит олупсан нәтнә мәхум янытлан нәпакыл ты майвәсыт.

Лёккарыт урыл

Мир пусмалтан рүпа-тат кәсың порат лёкка-рыт ат төвылхатәгыт. Та кастыл округувт тамле нәтмил вәрвес, тав руш щирыл тох ләваве – «Земский доктор/Земский фельдшер». Мөт мәныл мән округувн пәвлытын рүпитаңкве ёхтын лёкка-рыт ёт нәпак хансаве, сәв «компенсация» олныл ойтавет, та договор-нәпа-каныл щирыл тәнанылн ат тәл рүпитаңкве эри, нәмхотталы пөхын ул вос минәгыт. Ань олум сапрә-ният лёккарыт урыл сәкконын тамле ләтңыт хасвәсыт, ты тәлныл тәрпи тыналан лёккарыт тамле олныл ос ойтуңкве патавет. Алексей Добровольский, мир пусмалтан де-партаментыт рүпитан кұщай хум, тамле пәвлыт урыл потыртас – ты Саран-пәвыл, Кульпас, При-полярный ос мөтаньт.

Тув мөт мәныл хотты хөтпа рүпитаңкве те ёхты, тав ётә договор-нәпак хансаве ос акторыг сәв «компенсациял» олныл миве. Та юи-пәлт тав ат тәл сыс рүпитаңкве паты, нәмхотталы пөхын ул вос мины. Ос сартын те пөхын патхатуңкве тахмаи, тав та маим компенсация-олнанә ювле пувавет.

Хаништахтын мәныл әстум мәньлат лёккарыт тәнти олум пәвланылн



Е.Д. Айпин



Сапрәнияныл элы-пәлт гимн-эрыг хүйтләгыт

рүпитаңкве те минәгыт, тән ос аквтох ты олныл ойтуңкве вәрмавет.

Тәнүт-пормас элы пәвлытын тотнә урыл

Округ миркол кұщайт тәнүт-пормас элын олнә пәвлытын тотнә сәккон хот-щуртумтаңкве тах-маясаныл, ты сәккон «о северном завозе» ләваве.

Кұщайт ләвәгыт, лов тәл сыс нәмхотъют ты сәккон щирыл нәтмил ат вөвыглас. Мән Ассамблея депутатанув номтаныл ат кос патыс ос сәвыңпәлэ кәтпос та мәгыс та пин-сыт.

Мән округувт Белояр-

ский, Хальүс, Кондин-ский, Нижневартовский, Октябрьский, Ханты-Мансийский районыт ты «северный завоз» нупыл хансым оләгыт. Тәнүт-пормас тотым рүпитан хөтпат ань федеральный сәккон щирыл пуссын нәтуңкве патавет. Таи-мәгсыл ты сәккон йильпи щирыл пирмайтаңкве эрыс.

Мирн пәриим округ депутатыт мөтыт сапрә-нияныл мәньполь этпост тах вәрияныл.

Галина КОНДИНА

www.khanty-yasang.ru

Мәнки рӯпатав урыл потыртасуэв



Л.И. Теткина



В.Е. Енов



Ёхталам нъяврамыт ёт

Рётың юсвой этпос 21 хөталэт щань латың янытлан мирхал хөтал блыс. Ты кастыл Ханты-Мансийск үст «Язык – душа народа» нампа пұмаш тэла вәрыглавес.

Үст савсыр мирныл өлнэ нъяврамыт мәнщицт ос хантыт урыл савнув вос вәгыт, ханищтап ос наука департамент ос культура департаментыт рӯпитан кұщаит тамле эрнэ вәрмалъ щёпиталъсыт.

Төнт Ас-угорский институтыт, «Төрүм Маа» музейт, Творчество колт, Ас-угорский театрыт, «Лылың союм» нампа колт рӯпитан хөтпат акв яныг колт атхатыгласыт ос нъяврамытын тәнки рӯпатаныл урыл потыртасыт.

Акв мāt сәңквылтапыл сәңквылтаңкве, ййквуңкве ханищтавёсыт, мөт мāt савсыр ёнгилыл ёнгалтавёсыт, хурмит мāt нъяврамыт сәлы сун ұлтта поргысыт, кассыт.

«Лүймә сэрипос» ос «Ханты ясаң» газетатг рӯпитан хөтпат ос тув вөвыглавёсыт. Ханты хум

Владимир Енов такви хансум нэпақанэ суссылтасанэ ос нъяврамытн мөйттыт мөйттыс, стихыт ловиньтас.

Мәнщи газетат рӯпитан нэ Галина Кондина акв лильпи тэла урыл тот латың лавыс. Ты тәлныл мән ханты ос мәнщи газетатг хаснэ потранув турсуил хансуңкве өвылтасануэв. Газетатг кәсың номерт сәтахтем потрыт щань ләтңыл ловиньтыянүв ос «Ханты Манси Мир» лөпсыт ищхыпың мән вәриянүв.

Ловиньтан потранув хөт хунтлуңкве рөви, Галина Рудольфовна нъяврамытын тот суссылтас. Тав лавыс, щань ләтңув ул вос сөймыс ос элалъ тотнэ мәгсыл мән ты рӯпата вәрилүв. Кәсың элумхөлас потранув ищхыпың мāt хунтлуңкве ань вөрми.

«Ханты ясаң» газетат

рӯпитан нэ Людмила Гурьева «Ханты мөйттыт» лильпи нэпак нъяврамытн суссылтас. Людмила Тихоновна тох лавыс:

– Ханты газета 67 тәл сыс тәратаве, мәнщи газета «Лүймә сэрипос» рётың юсвой 11 хөталэт 35 тәлэ төвлыс. «Ленин пант хуват» нампа газета өвыл номер 1957 тәлт яныгтаквс этпос 1 щислат тәратавес, ётыл «Ханты ясаң» намыл намаявес.

Ань газетат рӯпитан хөтпат «Ленин пант хуват» 1950-1970 тәлыт сыс хансым мөйттыт акван-атсаныл, руц ләтңыл толмаштласаныл ос нэпакыг вәрсаныл. Ты рӯпата ханты газета 65 тәлэ төвлын кастыл щёпитасыт. Нэпак тәратан мәгсыл округ Дума депутат Еремей Айпин олн тәстыс. Мөйттыт нъяврамыт мәгсыл хасвёсыт. Ас-угорский институтыт рӯпитан нэ Наталья Жеманская хурит тув пөслас.

Людмила Тихоновна нъяврамытын ханты ос руц ләтңыл мөйт мөйттыс.

Та юи-палт «Лүймә сэрипос» мәнщи газетат рӯпитан нэ Людмила Теткина «В мире сказок и легенд» нампа нъяврамыт мәгсыл вәрыглам касыл урыл латың лавыс.

Мөлтү тәл әгирищит-пыгрищит сосса мирыт мөйтаныл, пёс потраныл ёмашакв ловиньтасыт ос ты урыл акв лөпсын хаснэйвыл манос өльпыл нила манос кит хури акв пөхыт пөслысыт. Ос акв-кит латың мәнщи манос ханты ләтңыл тув хассыт. Руц ләтңыл ты хурит «комиксыг» ләвавет.

Төнт округ янытыл мәнщи ос ханты нъяврамыт пуссын аквёет 104 пөслум хурит мәнван кётсыт. Тән халанылт 14 нъяврам нөх-патсыт.

Нъяврамыт «Этпос ос Хөтал» мөйт мәнщи ос руц ләтңыл ловиньтавёсыт. Ос ты мөйт щирыл тәнки «комиксыг» ләвнэ хурит пөслуңкве ханищтахтастыт.

Людмила ТЕТКИНА

Үст сәлың махум кассыт

Маньполь этпос 1-2 хөталагёт Ханты-Мансийск үст округ янытыл блнэ сәлы үрнэ махум халанылт кассыт. Ты тэла намаявес «IX конкурс профессионального мастерства среди оленеводов на Кубок Губернатора Югры». Сәлың махум ат мәныл ёхталасыт – Хальүс, Белоярский, Ханты-Мансийский, Нижневартовский ос Сургутский районтыл блсыт, пуссын аквьёт 30 хөтпа кассыт.

Өвыл хөтал касум махум нэпакыт ёт рүпитасыт – тест нампа китыглахтын потрыт ловиньтасыт, сәлыт хумус пусмалтаңкве эри, манарыл тыттуңкве, та маныр, эрнэ ләтңыт пёриясыт ос нэпаканылн хассыт. Китыт хөтал ос сәлың суныл яласасыт, ёсал хәйтсыт, тыньщаң рёпыгтасыт. Касуңкве аstumаныл юипәлт, нэпакын хансум тэланыл ос сәлыл яласан наканыл акван-ловиньтавёсыт, тувыл ущ мак ёр хөтпат тәра-паттувёсыт.

Сәлыл каснэ мән округ кұщай нэ Наталья Комарова ёхталас, мощ сунсыс, сосса махум сәлыл хумус яласэгыт, тән ётаныл потрамас.

«Союз оленеводов ХМАО-Югры» организация тармыл пунқотнэ хум **Степан Кечимов** сәлың махум янытласанэ, сәв ёмас ләтың тәнанылн ләвыс. Мәнлат хөтпат мәгыс тав номтэ тай ёмас, хум тох потыртас:

– Сәлы үрнэ хөтпанув сәлыл яласаңкве кәсың тәнти мәнанылт ханищтахтэгыт, районанылт олыглан ялпыңхөталыт порат халанылт касэгыт. Тувыл хунь молях яласаңкве патэгыт, яныг үсн ёхталэгыт. Мән ань Югра мāt блнэ мак ёр хум ос нэ хөтпат, пыгыт ос агит кәсалэв, сунсэв, хумус тән сәлыл касуңкве хә-

сэгыт, пёлпыщ яласэгыт. Матёмас ань мән махум тәнти пёс йис наканыл янытлыяныл, сәлы үрим яласэгыт, яныгхөтпанылн нётэгыт, тувыл тыт касуңкве алымёгыт.

Сәлыл каснэ вәрмал

Я-ты, ань сәлың махум касуңкве та өвылтахта-сыт. Овлэт хум хөтпат тән сәлың суныл яласасыт, ты юипәлт товтыл масхатасыт, сәлыянылн лүлим тотвёсыт, ётыл ос товтыл нас хәйтсыт, тыньщаң рёпыгтасыт.

Нэ хөтпат ос өвлэт сәлың сунын нәйив тәлттысыт, мөт мән тотсаныл. Ань хотьютаныл кәркамыщ рүпиты, молях яласы, тав та нөх-паты. Тувыл тән ос хум хөтпат холыт сәлың суныл кассыт.

Каснэ махум халт шар мән хөтпа наме ләввес – Екатерина Юрьевна Сопочина (Сургутский район). Шар мак яныг хөтпа ос Андрей Савватеевич Канев (Белоярский район).

«За лучшие производственные показатели» номинацият Николай Павлович Тасьманов нөхпатыс, китыт места Сергей Александрович Пяк вистэ, хүрмит – Алина Олеговна Тэвлина. Тән пуссын Белоярский районныл ёхталасыт.

«Чемпион многоборья»



Нөх-патум хум Юрий Кузьмич Тарлин

номинацият хум хөтпат халт Валерий Алексеевич Русскин (Сургутский район) нөх-патыс, китыт места Юрий Кузьмич Тарлин (Белоярский район) вистэ, хүрмит – Сергей Алексеевич Русскин (Сургутский район).

«Чемпион многоборья» номинацият нэ хөтпат халт өвыл места Анастасия Анатольевна Комтина (Ханты-Мансийский район) вистэ, китыт – Наталья Борисовна Сопочина (Сургутский район), хүрмит – Анастасия Владимировна Айваседа (Нижневартовский район).

Тән нөх-патсыг

Шар мак яныг нам – Абсолютный чемпион конкурса профессионального мастерства среди оленеводов автономного округа на Кубок Губернатора Югры хум хөтпат халт **Юрий Кузьмич Тарлин** наме ләввес, нэ хөтпат халт ос **Анастасия Анатольевна Комтина** нөх-патыс.

Юрий Кузьмич Белоярский район Касум

пәвылт блы, тынакт 50 тәлэ төвлыс. Ювле хуль-тум этпост Касумт аквтох сәлыл яласан касыл блыс, тав тот ос нөх-патыс, «Буран» нампа түйт тармыл яласан машинал мүйлуптавес, тыт ань китыт «Бураныл» майвес.

Юрий Кузьмич ләвыс:

– Ты үсн ам 2014 тәл пәсныл касуңкве ёхталэгум. Китыглахтын тест-потрыт хаснэв порат мощ тәрвитың, тасәвит хащтал ләтңыт, хумус хансуңкве, маттем та номсахтэв. Сәлы үрим тай мән тәгыл яласэгум, тыньщаң рёпыгтэгум. Вөтасың хөталт мощ тәрвитың-нуве, тыньщаңанув вөтын сөви тотавет, ос тох тай ати тәрвитың, ханьщувласув. Тынакт ам ётум Артём пыгум ёхтыс, сәлың махум халт ос касыс.

Нөх-патум нэ Анастасия Анатольевна Комтина 31 тәлэ, Сургутский район Русскинская пәвылныл ёхталас. Тав ос «Буран» нампа түйт тармыл яласан машинал мүйлуптавес, нэ ләвыс:

– Сәлыт – ты мән



Салы үрнэ мэхум нэпакыт хансэгыт

блупсав, тэлэ-тувэт салыл яласэв. Ам тыт ань хурум номинациятт бовыл места висум, ос нөх-патнэм, ат номсысум. Хунь намум лаввес, вәим щәгтсум.

Мөт касылыт блсыт

Мөт тэлат палт бс касылыт вәрыглавэсыт – ёрнколыт уральтавэсыт, тувыл манхурип тэнут пәйтэгыт, атың ман ати. **«Лучшее национальное жилище»** номинациятт бовыл места Елена Терентьевна Федотова (АНО «Нумсаң Ёх» Мыслящие люди, Белоярский район) вистэ, китыт – Елена Афанасьевна Рокина (Хальүс район), хурмит – Майя Александровна Швейд (Сургутский район).

«Лучшая национальная кухня» номинациятт Лидия Александровна Алясова (Ханты-Мансийский район) нөх-патыс, китыт места Тамара Ивановна Вынгилева (Хальүс район) вистэ,

хурмит – Сайра Сайретдиновна Атаманюк (МАУ «Межпоселенческий центр национальных промыслов и ремёсел», Нижневартовский район).

«Лучший традиционный костюм семьи»

номинациятт бовыл места Галина Котевна Покачева (Нижневартовский район) вистэ, китыт – Светлана Александровна Тарлина (Белоярский район), хурмит – Анастасия Александровна Нецветаева (Сургутский район). Хальүс районныл олум нэ Варвара Прокопьевна Хатанзеева конкурсный комиссиян «Специальный приз» наппа мүйлупсал майвес, кәтыл юнтум маснунанэ магыс бс янытлавес.

Ты тәл кит йильпи конкурсыг вәрвэсыг, акватэ **«Стойбищная семья – долгожитель»** – Белоярский районтт олнэ Тасьманов колтәгыт



Салы үрнэ хум А.С.Тарлин тыньсаң рёпыгыт

янытлавес, мөтанэ намаявес **«Многодетная оленоводческая семья»** – тыт ос Нижневартовский районтт олнэ Айваседа колтәгыт янытлавес.

Касыл ойгпаме элыпәлт округ кұщай вәңын хум **Алексей Забозлаев** лавыс: – Салың мэхум халт кәсың тәл матъёмас сәв мәнәлат хөтпат ёхталэгыт, тәщиңк салы үрнэтәла сәв тәл блуңкве паты. Мөтыт тәл тыт, Ханты-Мансийск үст, 10-ит касыл вәрөв. Та кастыл нән, салың мэхум, щёпитахтуңкве ань бовылтахтән.

Хальүс районныл тынакт 8-ит бригада ёхталас, тән ётаныл ос мөт мүй хөтпат ёт потрама-

сум, пöслысанум. Ты мэхманув бовылтыт мөтыт газетат хансэв тах.

Акван-атхатыглам мир магыс ханты нэ Вера Кондратьева, «Октябрь» клуб кол артистыт ос Москва үсныл ёхталам эргыт хаснэ хум Владимир Мирза эргысыт.

Үс мир, мүй мэхум салыл яласан касыл суссыт, ёмас номтыл ёмыгтасыт, пöслахтасыт. Тыналан палаткәтт сәвсыр пормас, тэнут ёвтсыт, ёрнколытн щалтсасыт, толтыглахтасыт, хүл исмит, исум щәй айсыт.

Светлана
РОМБАНДЕЕВА



Ялпың-нёл-павылт өлнэ мәнъщи Эква

Зоя Павловна Самбиндалова Хальүс район Шайтанкат (Ялпың-нёл-павылт) өлы. Мәнъщи Эква Малеевка павылт самын патыс, ётыл омаге-әтяге ёт Шайтанка павылн вәнтлас.

Зоя Павловна такви өлупсатэ ос рўтанэ урыл мәнъщи газетав мӓгсыл тох потыртас:

– Ам омам наме Евдокия Ефимовна Лихачёва өлыс. Рўтанум Пёс Шайтанка павылт өлсыт. Ты пёс павыл Шайтанканыл ат вёрыстат ўнлыс. Омам потыртӓлыс, Лихачёвыт Нёр тапал ёрныл тыг ёхтысыт. Яныг ащбйкам Хальүс пўпколт савалап нйврамыг яныгмас, тав 1846 тӓлт самын патыс.

Атям Павел Васильевич Самбиндалов наме өлыс. Опам Мәнъя-сўнт павылныл тыг ёхтыс. Тонт, улпыл, хўл Ас ят алыщлас ос өлуңкве тыт хультыс. Мәнъя-сўнтыг өлнэ рўтанув ёт атям вӓйхатас, ам иң нйврамыг өлсум, хунь тав тӓн палтаныл ялыс. Ам тай та мӓт өлнэ рўтанум щар ат вӓщиньтасанум, нас вӓглум, тот Самбиндаловыт өлӓгыт.

Атям 1941 тӓлт лўпта э́тпост хӓнтлаңкве тотвес, юв 1943 тӓлт кётвес. Тонт «За отвагу» нампа мӓглын тагатап пӓсыл майвес. Юн колхозт хўл алыщлан хӓтпаг рўпитас. Щёмьяв яныг өлыс, омагум-әтягум лувыт, мисыт ос пӓлят өщсыг.

Ам Восыңтўр павылт 8 класс а́стласум. Тувыл Тюмень ўсн минасум, туп акв тӓл тот ханищта-тасум. Омам а́гмыңыг ёмтыс, ам юв вӓввёсум. Тав акв тӓл өлыс ос хотталь та щалтыс. Атям яныгпӓлаг ёмтыс, таве таккёт хумус оссувлылум, юн та хультсум, яныг ўсн

ханищтахтуңкве воссыг аты минасум. Шайтанка павылт вӓй вӓрнэ станциян рўпитаңкве патхатасум. Колхозув хунь лӓкква-патыс, ам «Хорам» нампа организация мӓгсыл мӓщтырласум. Тамле тӓла Светлана Кирилловна Гындышева вӓрыглас, мӓщтыр хӓтпаг акван-атыгласанэ ос вӓрум пормасанув э́лаль тыналасанэ. Ам хорамың шулкиныт, пӓссат сагсум. Ты пормасыт сагуңкве Анисья анёквamn ханищта-вёсум.

Зоя Павловна мәнъщи лӓтың вӓнэ хӓтпаг өлы. Аще сӓв пёс йис потрыт, э́ргыт, мӓйтыт вӓс. Тав палтэ сӓвсыр учёный мӓхмыт пёс потрыт ёлхансуңкве ёхталасыт. Акв порат венгр учёный нэ Ева Шмит тав ётэ хӓнтхатыглас ос тавёныл сӓв потрыт нэпакн хансыс.

Ялпың-нёл-павылт я вӓтат яныг а́хвтас хуи. Пёс порат мӓхум ты пӓ-



З.П. Самбиндалова

выл тӓра миннэ порат олнкёр тот пӓхвтысыт. Яныг а́хвтас урыл «А́хвтас Эква» пёс йис потыр өлы. Зоя Павловна ты потыр а́тятэныл хўлыстэ:

– Нэ Отыр-бйкатэныл Руц-Отыр палт ояс. Тэ́н ты мӓт аквӓёт өлмыгтасбйг. Нэ пыг ӓньщас. Такви нйвраме алуңкве таңхыстэ, Руц-Отыр та пыгрищ алуңкве ат мистэ. Хоса ман вӓти өлсыт, пыгрищ яныгмас, ёрыг, тӓксарыг ёмтыс, тав юртанэ халт щар тӓксарыг өлыс. Пыгрищит тав нупылэ акваг

кантилысыт, манрыг тӓн халаныл тав акваг нӓхпаты.

Аквнакт ёнғынэныл халт, пыгрищитн лӓльт нёрасавес:

– Руц-Отыр наң щӓнян нӓг тотыстэ.

Пыг мӓньхӓпн тӓлыс, Тӓгт я алгаль минас. Эс Сӓюм пӓхыт сӓмыл маснутыл масхатым кит хумыг кӓсаласаге. Тавён тӓн лӓвсбйг:

– Апыгрищ, наң яныг ёмтсын, тӓксарыг ёмтсын.

Тӓн хӓнтыг минасыт. Руц-Отыр аласаныл, пуңксоватётэ хот-нуи-саныл, нӓңкйивн нӓх-тагата-саныл. Нэ оюңкве таңхыс, сып ёлы-пӓлн тахамтас. Тӓн таве кёр тыньщӓныл пувсаныл. Тав Эсырманыл а́хвтасыг овумлас, а́нь тыг мус та мӓт хуи. А́хвтас тармыл палин ке пинылын, суйты, хумус тав пунал тот рӓты.

Зоя Павловна ос лӓвыс, яныг а́хвтас сып ёлы-пӓлт акваг хуяс, юи-ӓвил тӓлыт лӓңх вӓруңкве ӓвилта-вес, я вӓтан тув хотталь лаквтувес.

Людмила ТЕТКИНА



Ялпың-нёл-павылт

Тучаңыт ос мот пормасыт юнтэв



Е. Вьюткина



Александр ойкатэ нъявраманэ эт лбли

Маньщи мирув халт
щаквщин хотпа сав блы.
Хальүс район Саранпавыл
нэкет щаквщин коланыл
«Сделано в Пауле» намаясаныл,
тот тан йинсахтэгыт,
юнсахтэгыт, тынтлахтэгыт.

Варнэ тэланыл тармыл Евгения Валерьевна Вьюткина тав пуңк-тоты. Ты маньщи нэ эт потрама-сум, китыглахтасум, маныр юнтэ-гыт, хотыютн ханищтавет. Нан ань элалы Евгения Валерьевна потре ловиньтэлы.

– «Сделано в Пауле» мастерской колувт ман 2019 тал пасныл щаквщев. Овлэт нэпак бщнэ колт атхатыгласув. Ётыл мён ойкамён-тыл блнэ кол унттысамён, акв колнак мащтырлан колнакыг щёпитаслумён, тот атхатыглаңкве патсүв.



Щаквщункве ёхталан нэкет

Хунь щаквщункве ущ бовыл-тахтасув, ман грант тэла щёпитасув, Елена ос Геннадий Тимченко фондын кётыслув. Тувыл латың ёхтыс, ман тэлав нөх-патум, олн-лөмтыл кётвесув. Та юи-палт ман совныл тучаңыт юнтуңкве патсүв.

Совныл варим тучаң хургыт маньщи махманув пёс порат юнтыгласыт. Төва хөтпанув тамле тучаң нас номияныл, вэщинталсыт, ос нэмхотыютув ат юнтыглас. Нуй тучаң тай юнтыгласыт ос совныл воруңкве ань ущ вуйхатасув.

Саранпавлуvt оленеводческий совхоз блыс, төва нэкет тот рупитасыт, кёнтыт, пуркит, вэит-нйрат ос мот маснут-пормас юнтсыт, салы сов эт рупитасыт. Тучаң ат тэпыл юнтыгласыт ос хансат якуңкве, акван-юнтуңкве хасэгыт. Ты каркам нэкет манавн ань нётэгыт, матыр-ати хултыглэгыт.

Тох ханищтах-тым, халанувт акван-нётхатым, ман пёс щирыл сат тучаң юнтсүв, тув сат пормас пинсүв. Хөт тучаң Россият блнэ музейн мүйлуп-тасанув, акв тучаңув Венгриян кётыслув. Ань сав мат махум ваганыл, маньщи

нэкет элнаң хумус мащтырласыт, щаквщин хургысованылн маныр пинтласыт.

– Евгения Валерьевна, совныл тучаң юнтуңкве, улпыл, тэrvитың?

– Вайм, нас хунь, төр манос нуй маснут ос пормас воруңкве тай ваңкве эри, хумус юнтуңкве, тыт ос вермуңкве эри. Хөтпа сов ос сас эт акваг те рупиты, тав катэге тэксарнувег, юнтупе хартуңкве верми. Анум өвлэт сов хансат юнтуңкве сака тэrvитың блыс, юнтупум хотсаквалы. Мот юнтуп ат артми, лэпкат та китыглахтэв, маттем та пёриев. Тан ос манти вэрёв, ханищтахтасув, ань тай хасэв, сов пормасанув таныл юнтыянүв.

– Сасныл матыр юнтыгласын?

– Мөлты порат «Мань Ёске» нъяврамыт ушлахтын мат сасныл щаквщин ханищтап вэрыглавес. Ханты-Мансийск усныл маньщи нэ Галина Рудольфовна Кондина ёхталас, тав манав апа воруңкве ханищтастэ. Махманув пёс порат сасныл хумус щаквщисыт, тав та щирыл вэри. Сас хумус пёрияве, хоты порат нуяве, хансат хумус щуртавет, та маныр, пуссын ваг ос хасы. Галина Рудольфовна ома тэн ханищтавет, маньтэгыл сунсыс, хумус тав щаквщис. Ома тэ Аксиныя Степановна Мерова, мөлты сменав тав наметыл лэвим блыс.

Ам омам салы совныл юнсахтас, пуркит, кёнтыт юнтыс. Тавёныл суссум, хумус тынтлахтас, йинсахтас, ханищтахтасум. Оныпум Агафья Алексеевна Вьюткина щаквщункве ос сака хасы, ойкатэн ос пыганэн кувшит юнты, вэит, нйрахопит, пуркит, та маныр, пуссын вэри. Сахит бныщи, ос такви юнтыглас.

Ойкам наме Александр Васильевич, хурум нъяврам янмал-тымён – Анямён 9 тэлэ, Гриша 5 тэлэ, Матвей пыгумён 2 тэлэ.

Евгения Валерьевна ос тав этэ щаквщин маньщи нэкет ман нэ хөтпат ялпыңхоталыл янытлыянүв, сав ёмас, сымың латың тананылн кётэв! Пустэгыл вос блэгыт, вос мащтырлэгыт, эрнэ, пумыщ пормасыт вос вэрёгыт!

Светлана РОМБАНДЕЕВА

Ам мирн нётуңкв кәсащәгум



М.О. Рогачёва

Мария Олеговна Рогачёва - мәньщи нә, такви бпарищ наме Алексеева, тав Хальүс район Саранпавылт самын патыс ос тот яныгмас.

Ань тав Ханты-Мансийск үст округ яныг пүльницат лёккарыг рүпиты. Пусмалтахтуңкве ёхталан мэхум тав урётыл сака ёмас ләтңыт ләвёгыт, тав агмың хөтпат мұсхал щирыл сунсыянә ос эрнә тәрпил хансыянә, сымын рөвнә ләтңыл ләвиянә.

– Мария Олеговна, ләвен, хунь наң лёккарыг рүпитаңкве тахмаясын, хөт наң ханищтахтасын?

– Ам Хальүс район Саранпавылт яныгмасум. Сәтыт классыт ханищтахтамум порат, тонт лёккарыг рүпитан урыл номсахтуңкве патсум. Та пәсыл ам акваг ты урыл номсасум ос вәслум, ам лёккарыг ханищтахтуңкве патәгум.

Школа асламум юипәлт Омский медицинский академият лёккарыг ханищтахтасум. 2006 тәлт диплом-нәпакыл майвёсум, ам тәра

рүпитаңкве патсум, та порат иң элаль ординатурат ханищтахтасум, тав лёккарытын ос аслаңкве эри. Тох ханищтахтым ам рүпатан ялантасум. Пүльницат лёккар ат төвълхатас, тот рүпитаңкве ам тәра кәсащасум.

– Мария, рүпатант матыр тәрвит вәрмалль блыгыл ос маныр наңын ты рүпатант сымын рөви?

– Ам мэхумн нётуңкве кәсащәгум. Ос кәсың мәт такви хурип тәрвит блыгыл. Анумн таи лөль, агмың хөтпат пирмайтан порат щәсанув мощцаг вәрвёсыт.

Акв элумхөлас ам молях вос сунсылум, тав торың щирыл титылаңкве, тав ётә потыртаңкве мұсхал щирыл ат алымёгум, тәра мөт хөтпа элаль вос пирмай-

тәгум. Ты коныпал план щирыл сәвнүв мэхум прививкал вос вәриянув, рүпитан хөтпат ос янас уральтахтуңкв вос ёхталәгыт.

– Наң агмың хөтпат пирмайтан коныпал ос мөт рүпата вәруңкве алымёгын. Наңти щёмьян нётавен, тән наң вәрнә рүпатан вәганьыл?

– Амти щёмьям, бйкам ос тит агирищтәгум, тән, вәим, вәганьыл, ам аквосытыл рүпитәгум, агмың хөтпат пусмалтәгум, тәрпит тәнанылн хансәгум. Агиягум 7 ос 12 тәл янытаг, тән торгамтытән – мирн аквосытыл пусмалтахтын вәрмалль эри.



М.О. Рогачёва тәгум хуриг

– Мария Олеговна, наң мәньщи ләтың ос сосса блупса вәглын?

– Амти мәньщи ләтнум ат вәглум, ты урыл сымум сака щәрги. Туп акв матах ләтың вәгум, тәнаныл ләвуңкве вәрмёгум, тувыл та. Уст блым маныр номёгум, таи мәньщи щирыл вәрыгләгум. Туи порат ань төванакт ам «Мәнь Ыскве» нъяврамыт ушлахтын мән ялантәгум, тот блнә пора ам сака эруптылум.

– Ам вәглум, наң мәнь

порат «Мәнь Ысквен» ялантасын, тот блсын. Ты урыл маныр номёгын ос эруптәгын?

– Тот пуссын халанылт юртыңыщ бләгыт, халанылт нётхатәгыт, ханищтахтәгыт. Нъяврамыт нәмхуньт лөль ләтың ат ләвёгыт, таи ты ёмасыг блы.

Мария мәнь порат хумус та нъяврамыт пәвылт блыс ос хумус яныгмас, ты урыл мәнавн Любовь Павловна Стананова, «Мәнь Ыскве» күщай нә потыртас, тав тох ләвыс:

– Маша Алексеева щар иң мәнь тәгыл «Мәнь Ысквен» ёхталаңкве патыс, тав яныг, мұтраң хөтпа хольт мөт нъяврамыт ёт потыртас, тәнанылн нётмил вәрыс, хөт матыр эрнә ләтың ләвуңкве вәрмыс.

2004 тәлт мән «Парламент Мировых народов» нампа ёнгил нъяврамыт мәгсыл вәрыгласув, тонт Маша «Здраво-строительство жизни Мәнь Ыскве» вәрмалль вәруңкве номылматас ос тот нъяврамыт пустәгыл, тәксарыг яныгман урыл потыртас. Тот кәсың нъяврам номсахтас ос такви ёмас тәланә урыл потыртас.

Маша юртәгирищанә-пыгрищанә ёт юртыңыщ блыс, эрнә торыг хултыгласанә – маныр, хумус вәрапаңкве эри. Ань ос Мария Олеговна «Мәнь Ысквен» ёхталы ос нъяврамыт пусмалтым мән палтув рүпиты.

Тох ты мәньтәгыл элумхөлас таквинәтән эрнә рүпата пәрии ос элаль ты кастыл ханищтахты. Тувыл блнә нотә палытыл мир пусмалтым, мирн тәксарыг блуңкве нёты.

Пётр Молданов потре
Г. КОНДИНА мәньщи
ләтңыг толмашластә

Тэрпит акван-атэгум

Мәньполь этпост нэ хөтпат янытлан мирхал ялпың хөтал янытлылүв. Ты кастыл ам акв ёмас мәньщи нэ эт хөнтхатыгласум ос тав этэ потыртасум. Тав наме Юлия Леонтьевна Сайнахова, әги бпарищ наме Хозумова. Тав нъяврананэ эт аквписыг мәньщи ләтңыл потырты.

Сосса мир блупса ос пёс вәрмаянув, пёс наканув ўргалым колтәгланылт оныңияныл. Мён Юлия Леонтьевна эт щәмьятэ урыл потыртасмён. Насати, тав школат ханищтахтаме порат мәньщи суп юнтуңкве бвылтахтас, ань ос тбр лөмт тармыл руц щирыл «крестикыл» сәвсыр хурит юнты, турлөпсыт, пальсакыт хорамың олнкасыт сакныл харты.

– **Юлия Леонтьевна, наңки урыл мощ потыртән, хөт самын патсын, хөт яныгмасын?**

– Ам Лөпмус пәвылт самын патсум ос яныгмасум. Сәттал мән колтәглув эт Лөпмуст ос Пупйисум мәнь пәвылквет акваг блсүв. Ам ты мәнь пәвлув сака эруптылум, хунь тув ялсүв, тот сака ёмас блуңкве. Хунтлэгын, хумыс вбрт ўйришит луйгегыт, туи порат я вите суиңыщ хумплы ос вольги. Сымын такем ёмас ос лылтуңкв

күпнит. Мән пил вәтуңкве, ләхыс ос пәкв атуңкве вөрн акваг ялсүв.

1996-2006 тәлыт сыс ам Кульпас школат ханищтахтасум, тот яныгмасум. Школат ханищтахтамум порат ам вәрмал тәл ат ўнлысум, сәв тәла блыс. Интернатт сәвсыр касылыл кассүв ос товтыл хәйтыгтасүв, матахмат щёс Хәльүсн товтыл касуңкве ялсүв.

– **Школа әстламын порат хөт элалы ханищтахтасын?**

– Ам ань Ханты-Мансийский технологический колледжит «мәнь нъяврамыт ханищтан хөтпа» нампә специальностьн ханищтахтэгум, 2024 тәлт тах әстлэгум.

– **Наң нас блнэ щёст маныр вәрбегын?**

– Мәньщи ос ханты нэт кәтыл мәщтырлаңкве сака эруптэгыт, ос әнумн пүмәщ турлөпсыт,



Ю.Л. Сайнахова

пальсакыт ос олнкасыт сакныл хартуңкве. Ханищтахтамум порат сәвсыр пормасыт вәрсум, Кульпас пәвылт культура колт вәрим суссылтапт ам вәрум пормасанум тот суссылтавёсыт.

Мәнь порат ам йильпи щирыл сәвсыр пөслым хурит сәтапыл юнтуңкве патсум. Светлана Николаевна Хозумова әквум әнум мәньщи суп юнтуңкве ос суп мәгыс пәквпалыт яктуңкве ханищтастә. Лөпмус пәвылт супум хультыс, иң ат әстыс, хунь тув ўщлахтуңкве минэгум, эрнэ щирыл юнтылум.

– **Юлия Леонтьевна, наң щәмьян эт хөт блэгын? Хөт рүпитэгын?**

– Хум хунь вәрсум, бйкам Михаил Вячеславович Сайнахов эт Няхщамвөлын вәнтлысум, тав этэ 15 тәл акваёт блсүмён. Хунь киттыг-минас мён, ам нъявранум эт Хәльүсн блуңкве минасум.

Мён хүрум нъяврам бньщимён, яныг пыгум наме Виталий, тав 15 тәлэ, 9 классыт ханищтахты, Ангелина әгим 5 классыт ханищтахты,

мәнь пыгум Данил, тав 1 классыт ханищтахты. Хунь Няхщамвөльт блсүв, яныг пыгум әще эт аквписыг хул алыщлаңкве ялантасыг.

Хәльүст ам пүльницат тэрпит акван-атэгум, хансыянув, ловиньтыянув, рупатам сака пүмыш.

– **Наң щәнә ләтңыл потыртэгын?**

– Щәнә ләтңыл щәмьявт юн аквписыг потыртэв, ам Елена Константиновна щәщәквам эт ос Ольга Степановна анәквам эт яныгмасум, тән руц ләтңыл шар ат потыртасыг, мәньщи ләтңыл потыртасыг. Ам нъявранум эт Лөпмусн хунь ялантэгум, тот рүт мәхманув эт щәнә ләтңыл потыртэв. Ам сымум сака шарги, ань яныгман нъяврамыт мәнки щәнә ләтңув шар ат вәганыл.

Мән, «Лүйма сәрипос» редакцият рүпитан хөтпат, Юлия Леонтьевна нэ хөтпат янытлан хөталыл янытлылүв. Сәв сөт, сәв зуңь! Төрүмн вос ўргалаве!

Оксана АЛБИНА



Щань латың хотал



А.Алгядьева махумн потыр ловиньты

Вәим махум рүпитәгыт, хот яласәгыт, ат астагыт. Аквнакт мән пәвлут Хальүс район Хулюмсүнт пәвилт 16 хотпа диктант хансуңкв ёхталас. Тахольтыл школаң кұщай нә аквьёмт тәратахты, диктант хаснә янас кабинетыл майлавев.

Диктант хансум хотпат халт шар яныг хотпаг Галина Константиновна Алгядьева блыс, тав 80 тәлэ, шар мән – Алгядьева Надежда, 10 классыт ханищтахты. Надежда такви щань ләтҗе ёмщакв вәгтә, мән тәгыл маньщи ләтңыл потырты.

Диктант хансум мәныл

әстумув юи-пәлт ос акв тәла бщсүв. Ты вәрмалыт кит тәл эрнә вәрмалыг састласлүв. Хулюмсүнт пәвилт руц ләвнә щирыл «Этно-центр «Точка росы» намба организация бньщев. Ты хосытыл мән олн бовсүв ос ты олнытыл эргың диск тәратасүв.

Галина Константиновна

Алгядьева сәв мәнщи эргы вәг, эргуңкв хасы. Наталья Константиновна Тасманова, Галина Константиновна эще, бвләт тав тамле (эргы хаснә пәрт) номт мис. Тав маныр эргыт ёл-хансым бньщас, нәпакын ёл-хассанә, руц ләтңыл такви толмашласанә.

Тувыл мот хотпат палт маныр ёл-хансым блыс, пуссын акван-атсанүв. Төва эргыт Галина Константиновна йильпи-иг эргысанә, Валерия Николаевна Кивелеван диктофонын ёл-хасвёсыт,



Г.К. Алгядьева

Эргыг вәрвёсыт. Тох ты эргыт нас хунтлан коньпал, кәсың хотпа эрыгсованыл щирыл кос-хоты ёнғын инструментаыл ёнгуңкв вёрмияныл. Ты хосытыл эргыт ханищтаңкв ос эргыг эргуңкв рөвёгыт.

Тох сәв хотпа акван-нётхатым акв ёмас вәрмалы вәрсүв. Диск тәратаслүв, таве ань хунтлуңкве вёрмилбін. Галина Константиновна тот махманән янытлавес, матъёмас агит-пыгыт магсыл эрганә эргысанә.

Анна АЛГАДЬЕВА

Ялпың тўя


Мәньюль этпос 1 хоталәт 2024 тәлт Ханты-Мансийск үст «Галерея-мастерская художника Г.С. Райшева» музейт «Геннадий Райшев. Весна священная» намба суссылтап рүпитаңкве бвылтахтас.

Кәтыл пәслум ханты хум Геннадий Степанович Райшев хуриянәт тўя пора сәв щёс пәслыглатстә. Ань ты суссылтап 1970-2010 тәлыт сис пәслыглам хуриянә кәсалаңкве рөви. Ойка вәрум тәлатә хосыт нәңки, ань элумхолас ос мән-вит аквтёмыл бләг, лылтәг, аквьёт номсахтәг, нёвсәг.

«Весна священная» суссылтап йис потрыт ләвилтым хотпат ос Нәй-

Отырт тәра-паттуңкве, ханьщункве вёрмегбін. Тән сома эргёгыт, йквёгыт, сәңквылтапыл сәңквылтәгыт манос мөйтәгыт, хурит хосыт пуссын кәсаләгбін.

Геннадий Степанович өлмәт ләвсас: «Төва хуриит матыр-әти пуссын нәңки. Ам ос мирн таи ләвуңкве таңхөгум, төва хуриянумт эрнә матыр ост әтим, ат нәңки, ос элумхоблас мощ вос ном-



сахты, маныр тув тўйтым блы, вос хонтытә. Тонт тав такви магсылә мак номт тәра-патты».

Райшев ойка нә хотпат сака янытласанә, хурин яныгш сосса нәт пәслыглас. Лямийв ос вәтихал пәслыс, ты хуриянә тох намаясанә: «Цветение черёмухи» (2001 тәл), «Цветущая черёмуха в зелени» (2003 тәл) ос мот сәв хурит. Тувле

әңкватәгыт, номтын татем ёмас, вәглын, ань мошёртн тўя пора ты ёхты, мәлтыпыг ёмты.

Ты суссылтап Ханты-Мансийск үст бйттур этпос 28 хоталә мус рүпитаңкве паты.

Екатерина Бубенова,
музейт рүпитан нә,
потре мәнщи ләтңыг
С. РОМБАНДЕЕВА
толмашластә

Няврам ханищтан нэг

Тынакт Нижневартовский район Варьёган павылныл Ханты-Мансийск үсн няврам ханищтан сосса нэг ёхталасбг – Маргарита Павловна Куклина ос Тамара Гордеевна Казамкина.

Маргарита Павловна сав тал интернатт воспитателиг рүпиты, нэ лавыс:

– Варьёган павыл интернатт ханты ос ёрн няврамыт ханищтахтэгыт, 1 классныл ос 9 класс яныт агиришит-пыгришит. Төваныл Аган павылныл, төват ос Варьёган павылныл өлэгыт. Оманыл-ätяныл сáлы үрим яласэгыт, вбраегыт, хул алыщлэгыт.

Няврамыт үргаланэм коныпал, тән ётаныл кихатнэ тэлат вáрегум, пёс йис наканув ханищтыянүв, тара-паттыянүв. Тувыл школавт өлнэ музей тармыл пуңкотөгум.

Ам Варьёган павылт 1966 талт самын патсум. Атям ёрн хум Павел Янчевич Айваседа, омам ханты нэ Татьяна Степановна Сардакова. Школа асламум юи-пáлт Ханты-Мансийск үс педучилищат өвыл классыт ханищтан нэг ханищтахтасум. Тувыл тара Ленинград үсн минасум, тот А.И. Герцен намба педагогический институтт ат тал ханищтахтасум. Диплом нэпакыл майвёсум, амти мамн, Варьёган павлумн, йисум. Овлэт школат няврамыт ханищтым рүпитасум, ётыл интернатт воспитателиг патхатасум.

Рүпатам щирыл Ханты-Мансийск үсн вáтихал ёхталэгум, Ас-угорский институтт манос щáнь лáтың торыг блыглан хөнтхатыглапытт акваг

доклад-потрыт ловинь-тáлэгум.

Ханты нэ Тамара Гордеевна Казамкина школат хус арыгтем тал рүпиты. Тав лавыс, ты тал 5 класс няврамыт палт классный руководителиг паттувес. Ты коны-пал мáнь мáхум ханты лáтңыл потыртаңкве ханищтыянэ, тувыл кáтыл матыр-áти вáрнэ «Бисеринка» ос «Каркам эви» нампатэлаг тармыл пуңкототы.

Тамара Гордеевна тох потыртас:

– Ханты-Мансийск үсн ам мólты порат өвыл щёс ёхталасум, тыт нэпак хаснэ финно-угор мáхум хөнтхатыглап олыс, округ кўцаин янытлан нэпакыл майвёсум.

Ам Варьёган павыл школат ханищтахтасум, интернатт олсум. Кол-тáгыл мáхманум вóрт сáлы үрим яласасыт, пáвлын сáлың суныл то-тыглавесүв, тувыл каникулыт порат ос сáлыл юв тотавёв. Ётыл «Бураныт» квáлтапаптувёсыт, та утытыл тыгле-тувле яласаңкве патсүв. Юн акваг щáнь лáтңыл потыртасүв, «Ханты ясаң» газета ёхты, тара ловиньтылүв. Ам хўрум пыг янмалтасум, яныг пыгум ты порат 25 тáлэ төвлыс. Пыганум щáнь лáтңув вáганыл, потыртэгыт.

Школавт яныгщ ханты няврамыт ханищтахтэгыт – Казамкиныт, Айваседа, Сардаковыт, Иуси, ёрн



М.П. Куклина округ кўцаин Н.Комарован янытлаве



Т.Г. Казамкина ос М.П. Куклина

няврам тай мощчануве. Ань щáнь лáтың урок áтим, агиришит-пыгришит ханищтахтын мáныл пойтнэныл юи-пáлт ущ ам палтум ювыт, ханты лáтңув ханищтаңкве та үнтэв.

Кáсың тал вáт сáграпнал этпост «Фестиваль родов» намба ханищтап блыглы, ты хөтал кастыл нявраманув ос щёпитахтэгыт, потрыт хансэгыт, ловиньтэгыт. Щáнь лáтың янытлан ялпың хөталт «Фронтальный диктант» хансэв. «Серебряная

иглочка» конкурс кастыл няврамыт ёт кáтыл сáвсыр пормасыт вáрөв. Ам агиришит щаквщүңкве ханищтыянув, акваёт матыр йинэв, юнсхатэв.

Маргарита Павловна ос Тамара Гордеевна сака ёмас, эрнэ тэла вáрөг. Ты кáркам, сымың нэквиг мáнь нэ хөтпат хөталыл янытлыягүв! Сав тал пус кáт, пус лáгыл вос өлэг, сөтыңыщ, щуниңыщ вос өлэг!

**Светлана
РОМБАНДЕЕВА**

Пупāпщитев хури ольпыл пōслысыт

Мōлты тāl Елена Петровна Белая, Нефтеюганск ūст историко-художественный музейт рупитан научный сотрудник нē, ёт ам Ханты-Мансийск ūст хōнтхатыгласум. Тав «Посың эт Нефтеюганскыт ѓлме порат» нампa вāрнэ рупата урыл потыртас.

Историко-художественный музейт рупитан кўщай нē Наталья Астрелина ос культура щирыл рупитан колт кўщай нē Наталья Поливенко тав ётэ ѓс ѓлсыг. Музейт рупитан нэг Дарья Дука ос Зилия Серебренникова ос няврамыт ёт рāктыныл вāрим пупāпщитев хури ѓльпыл сартсыт.

Елена Белая мўй мāхумн такви щёпитам суссылтапе урыл потыртас: «Посың эт Нефте-

юганскыт ѓлме порат» мāн рупитан мāхум ёт яныг суссылтап ёт рупитэв, хумыс пēs йис порат сāvсыр хульгум культура колыт ūнттысыт. Мāхманув ūс урыл сāvнув вāңкве патэгыт.

Суссылтап мāн няврам ос мāнылат хōтпат мāгыс щёпитаслўв, пēs йис накыт вос вāганыл ос вос пўмщалахтэгыт. Музей колт Ханты-Мансийск ūст школат ханищтахтын няврамыт мўйлуңкве ёхталасыт. Ос мōт ūсыт-



ныл ос пāvлытныл мāхум мāн сака ūриянўв, сāv хōтпат вос ёхталālэгыт, ūщлахтэгыт, сāv йилпи номтыт вос ѓньщёгыт, мāн ётув вос вāйхатэгыт.

Ёхталан хōтпат мāгыс «Пупāпщикве тумпкве» нампa пēs йис потыр щирыл суссылтап вāрсўв. Сāv мир вāганыл, Нефтеюганск ūс кит яг халт яныг тумпыт ūнлы. Хунь геологыт ты мāн рупитаңкве ёхтысыт, пупāпщикве тāнанылн тох лāвыс: «Я

сāv хўл ѓньщи, мā-вит щёлың, тыт сāv пил, йивыт ос лāхсыт яныгмёгыт, мā-вōй ос газ щёлыт то-тэгыт».

Пупāпщи ūс гербыт пōслым ѓлы, тав аквтуп элалы ёманты, тав ёр ѓньщи ос мāн тав нупылэ сунсым ѓлнэ тэлав ёмщакв вāрёв. Таимāгыс ты суссылтапт мāхум рāктыныл вāрим пупāпщитев хури ѓльпыл сартсыт».

Оксана АЛБИНА

Пēs накыт ūргалыянўв

Ты этпос 25 хōталэт Россия мā янытыл культурат рупитан хōтпат янытлыянўв. Ты кастыл ам Екатерина Юрьевна Мироненко, «Триумф» культура колт кўщай нē, урыл потыртэгум. Тāн яныг рупата сосса мир культура мāгыс вāрёгыт, тав тох потыртас:

– Октябрьский районувт мāн «Миснэ» нампa театр ёт яныг тэла хосыт рупитэв. 2021 тāлт округ кўщай пāлыл олн-нётмил висўв, ты рупатав ёт нōхпатсўв, тав няврамыт мāгыс щёпитым ѓлы.

Шеркалы пāvлувт сāv ханты ос мāньщи мāхум ѓлэгыт, культура колт



сосса ѓлупса мирн суссылтан мāгыс сāv рупата вāрёв. Мāнь тāгыл няврамыт тāнки лātңын ханищтаңкв эри. Ёнгынутыт ёт лātңанув ханищтаңкве рѓви, āгит āканил пēs пораныл ос ань тыг мус ёнгёгыт.

Мāн нэпакт тох хассўв, няврамыт тāнки āканил ѓнтэгыт, сосса мōйт ловиньтэгыт ос спектакль

мāгыс ѓщнэ кол кйвыр пормасыт кāтыл вāрёгыт. Хунь мōйтыт ловиньтэгыт, тāн тох ханты манос мāньщи лāтың ханищтахтэгыт.

«Миснэ» театр-колув ёт округувт сāv ūсытын ос пāvлытын ялантасўв. Октябрьский район мāгыс театрув «Акв хōтал Шеркалы пāvылт» нампa яныг суссылтапт ѓлы.

Культура колувт мāньщит ос хантыт сāvсыр колыт, сўмьяхыт ос ёрнколыт суңсуңкве рѓви.

Мўй мāхум мāгыс рупитан хōтпат эрыг эргёгыт, «Куринька» йиквёгыт, кāтыл аквёет мāщтырлэгыт, āканит ос маснутыт ѓнтэгыт. Мāхманув ёт хўл исмит пāйтэв. Мāн щāгтым ѓлэв, хунь сāv хōтпат мāн палтув ūщлахтаңкве ёхталэгыт».

Ялпың хōтал кастыл мāн ты колт рупитан хōтпатыянытлыянўв. Тāн сосса культура мāгыс сāv рупата вāрёгыт, Югра мāt сāv мирытн вāвет. Мāньлат хōтпат ос няврамыт щāнь лātңаныл эруптаңкве ос ūргалаңкве ханищтыяныл.

Оксана АЛБИНА

Сосса мирыт Өлупса ханищтэ



Н.А. Тучкова, Т.В. Волдина ос Э.П. Сургутскова

Мөллә «Торум Маа» музейт кит этнографыг Өт акван-хөнтхатыглан нак вәрыглавес. Тән сәв тәл сосса мирыт Өлупсаныл ханищтэ, сыре-сыр вәрмалит тәра-паттэг ос наука мәгыс нәпакыт хансэ.

Акватэ Наталья Анатольевна Тучкова, история наука доктор нам Өньци ос селькуп мәхум Өлупса ханищты, Ханты-Мансийскат «Мәвит ос Элумхөлас» наппа музей колт рүпиты.

Мөтанэ Татьяна Владимировна Волдина, доцент-нэ, история наука кандидатыг Өлы. Тав Асугорский мәхум институт рүпиты. Тән сас тәнки рүпататэн Өвылтыт китыглавесыг, потрагөн Элаль ловиньтэн.

Наталья Анатольевна Тучкова Томск үст ляпат самын патыс, ос та үст университетыт историкыг ханищтахтас. Ётыл аспирантура әстлас ос селькуп мәхум пәс на-каныл тәра-паттуме юипәлт, 1999 тәлт селькупыт урыл кандидатский

диссертация-нәпак хансыс. 2018 тәлт доктор намыл майвес. Сәвсыр пәс накыт тав Владимир Иванович Васильев, университетт история, этнография ханищтан учёный хумн, мұсхалыг тәра-паттуңке нәтвес.

Этнография рүпататэ өмщакв вәрнэтэ мәгыс тав селькуп мәхум халт сәв щәс Өлыс. Ты коныпал Томский областит Өлнэ хантыт, ёрныт, удмуртыт ос чуваш мирыт ханищтым яласас.

Ань Наталья Тучкова мәньлатыг Өлме поратэ урыл потыртас ос аквьёт рүпитан, мирн вәнэ учёныит наманэ ләвсанэ. Тән халанылт Владислав Михайлович Кулемзин, Сергей Александрович Арутюнов, Андрей Владимирович Головнёв,

Андрей Маркович Сагалаев, Надежда Васильевна Лукина ос мөтаныт.

Щар Өвыл щәс хащтәл мәхум пәлт миннэ ләңхе 1985 тәлт Өлыс. Тав ань та пәсыл сосса мирыт урыл Элаль пұмщалахтуңке патыс. Тувыл 1993 тәлт Нижневартовский район Варьёган пәвылн ялум ләңх урыл вәти кина ос хурит суссылтас. Төнт тән Александр Геннадьевич Тучков Өйкатэнтыл тув ялнэ мәгыс матыр пөслуңке вөвхатсыг.

«Ялум ләңхыныл нәмхуньт акв тамле хурипаг ювле ат ёхтэгың», – тамле ләтың Наталья Тучкова таве ханищтам хөтпаныл хунтамлас. Ос кәсыңьөмт тав хотты мирыт ханищтанэт мәгыс хотталы ялыке, сөль, щар мөт хөтпаг юв ёхты. Тав Өлупса урыл мөт щырил номсы, акв-тупмат мұтраңыг ёмты. Наталья Анатольевна Өлупсатэт тав ётэ акван-хөнтхатыглам хөтпатн, сәв номтың тәлан ханищтам мирытн пұмащипа ләтың ләвыс.

Элаль Татьяна Владимировна Волдина такви рүпататэ Өвылтыт потыртас. Өвлэт ләвыс, Наталья Анатольевна хұлтыглам учёныит тав Өс өмщакв вәганэ, тав тән вәрнэ рүпатанылтыл Өщатахтас. Татьяна Владимировна матыр тәра-паттуңке хоса ханищтахтас. Тав Томский университет аспирантурат юл ха-

нищтахтым 2000 тәлт әстластэ. Төнт кандидат учёный нам вуянтан мәгыс тав «История изучения хантыйского фольклора (XIX-XX нотыг)» наппа диссертация хансыс. Хансум нәпаке мәгыс мирн вәнэ этнограф-нэ Надежда Васильевна Лукина пұңкотыс.

Ты рүпататэ вәрмесыс тав мәньпора тәланэ номылматыглас. Тав Ханты-Мансийск үст самын патыс ос яныгмас кос, ос Мария Кузьминична Волдина омастэн Ас ос Назым вәтат Өлнэ пәвлытын рүт мәхманэ пәлт акваг тотыглавес. Мәнь Татьяна тән Өлупсаныл өмщакв вәстэ, тән щәнь ләтңаныл хунтлыс, сака сәв накыт вәганэ. Ань та сәвсыр пұмыщ накыт диссертация-нәпакет хансым Өлэгыт.

Тавён хұлтыглам хөтпат халт Маина Афанасьевна Лапина кәстыстэ, тән аквьёт ханты мәхум пәлт ялсыг, потрыт, пәс накыт нәпакн хансыгласыг. Тимофей Алексеевич ос Татьяна Александровна Молдановыгн мұтра ләтңыл акваг хұлтыглавес. Тән пуссын пәс накыт үргалым Элаль тотыяныл, ат рөвнэ накыт хөт-әти мориатсуссылтыяныл, нас эрнэныл щырил мәньлат мәхмытн потыртыяныл.

Ты учёный нэг хунтуңке пұмыщ Өлыс, тән потрөн кинан пөслувес, «Торум Маа» музей ищхыпың лөпсэт хөнтуңке рөви.

Тамара МЕРОВА

<p>Лүймә сәрипос (Северная заря) № 5 (1311), 14.03.2024 Соучредители Дума, Правительство ХМАО – Югры Издатель Департамент внутренней политики ХМАО – Югры</p>	<p>Редакция ВРИО главного редактора – Рагимова Н.В. Телефон (3467) 33-24-02 Заместитель главного редактора – Кондина Г.Р. Телефон (3467) 33-22-72 Ответственный секретарь – Узель В.В. Телефон (3467) 33-23-09</p>	<p>Адрес редакции и издателя: 628011, г. Ханты-Мансийск, ул. Комсомольская, 31 тел./факс (3467) 33-17-52 E-mail: gazeta@khanty-yasang.ru Газета размещена на сайте www.khanty-yasang.ru Отпечатано: ООО «Новости Югры- Производство» г. Сургут, ул. Маяковского, д. 14.</p>	<p>Индексы 04399, 54399 Тираж 1710 экз. Заказ 1048 Цена свободная Мнение авторов публикаций не обязательно отражает точку зрения редакции. Газета зарегистрирована Управлением Федеральной</p>	<p>службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО. 12+ Свидетельство о регистрации ПИ №ТУ 72-00795 от 23 января 2013 г.</p>
---	--	---	--	--

Такви пәслум хуриянә суссылтасанә

Нина Дмитриевна Хатанзеева Саранпавылт җы. Тав аще – Дмитрий Георгиевич Агеев. Мәлтынув нә атпан тәлә төвлыс, ты кастыл тав Ханты-Мансийск үсн ёхталас.

Намхоталә кастыл округ творчество колт рупитан махум суссылтап вәрсыт, тот Нина Дмитриевна пәслум хуриянә суссылтавёсыт. Ты этпос хурмит хоталәт та колн сәв мир ёхталас. Овләт нә такви урәтыл потыртаңкв вөввес.

Тав ләвыс, Днепропетровский область Павлоград үст самын патыс, та юи-пәлт щәмьяныл Молдавия мән вәнтлыс, тот тав эшаге самын патсыг. Нина 9 тәлә төвлыс, тән мән округувн блуңкв ёхтысыт, Октябрьский район Шеркалы павылн блмыгтасыт. Тот блманыл порат Дмитрий Георгиевич Саранпавылн рупитаңкв вөввес.

Та пәсныл сәв тал ювле хультыс. Саранпавылн вәнтлуманыл юи-пәлт Дмитрий Георгиевич 1993 тәлт «Сәлы лёңх» нампа театр вәрыс. Вәт арыгтем тәл сыс тув сәв пәвлың ныврамыт ялантасыт. Яныгмёгыт, мөт мән та минёгыт. Тән юи-

пәланыл ос мөт ныврамыт ёхтёгыт. Валентина Дмитриевна Перова, котиль агитә, ань тав пәнтсылә тот рупиты ос искусство школат күшаиг җы.

Нина Дмитриевна та школат җы рупиты, тав ныврамыт хурит пәслуңкв ханищтыянә. Такви щәмьятә урыл ань тох потыртас. Ойкатә Герман Семенович Хатанзеев, мащтыр хум. Тав сәңквылтапыт мащтырлаңкв сака хәсы.

Тән хурум ныврам җы щәг – тит пыг ос пити патта мән аги. Яныг пыгән Алексей ань Ханты-Мансийск үст искусство центр колт ханищтахты, тот тав эргуңкв ханищтаве. Мөт пыгән ос агитән иң школан ялантәг. Ань ты суссылтап Алексей ома-



Н.Д. Хатанзеева

магсыл акв эрыг эргыс, махум тавән кәтпатта маттем та рәтсыт.

Нә титыглавес, пәс рутаныл хотыл блёгыт. Тав ювле ләвыс, ома-тә ос атятә сас Томский областьт самын патсыг, рутаныл халт селькуп хөтпат җы блёгыт. Дмитрий Георгиевич җы патә ос атятә пупколт рупитасыг, руц Төрүмн агтсыг. Оманыл щирыл ляпа рутаныл җы пуссын эргуңкв сака ёмащакв хәссыт. Ул таимәгыс Нина ос Герман ныврамагән ос эще агиянә-пыганә пуссын ёмащакв сәңквил-

таңкв ос эргуңкв хәсёгыт.

Хурит пәслуңкв Нина Дмитриевна мән тәгыл ханьщувлас. Яныгмаме порат ома-тән-а-тя-тән акваг ләвсас – хури пәслын хөтпаг тах ёмты. Сөль, тох и ёмтыс. Школа асламе юи-пәлт тав Нижегородский университет аслам, та пәсныл искусство школат та рупиты.

Тув порат Ясунтыт блнә «Мән Усквен» ялантәлы, тот ныврамыт пәслуңкв ханищтыянә. Гитарал сәңквилтаңкв җы сака ёмащакв хәсы, ныврамытн эргыт эрги, такви хансум стиханә мирн ловиньтыянә. Тамле ты тав ёмас хөтпа.

Ань Ханты-Мансийск үсн ёхталаме порат махум ёт тав сака сымыңыщ потыртас, кәсың хуритә урыл янас потыр блыс, эргыт эргыс. «Хөтал» нампа театрыт рупитан нә Татьяна Фоминых акв стихе ловиньтастә.

Искусство центрыт ханищтахтын ныврамыт тув җы ёхталасыт. Тән «художественный» отделение ханищтахтёгыт. Тәнанылн кәсың хури урыл потыр хунтлуңкв сака пумыщ блыс.

Валентина ВАСИЛЬЕВА

